

To'on yó'o kían mií noó ni taa San Pablo ni sa'an noó na ñoo Tesalónica

Ká'an Pablo ndisá'án

¹ Yu'u kúu Pablo, ta yu'u xí'ín Silvano xí'ín Timoteo ká'an ndu ndisá'án xí'ín ndo'ó, na kúu kuendá Jesús ndéi ñoo ká'ano Tesalónica xaan, ndo'ó na ndíta xí'ín tatá yo Ndios, xí'ín de'e na Jesucristo, na kúu sato'o yo.

Ta mií tatá yo Ndios xí'ín sato'o yo Jesucristo ná kee ña maní xí'ín ndó, ta naki'o ná ña koo va'a ini ndo.

Ná'a na ñoo Tesalónica ña ndíta ndaa na xí'ín Ndios

² Daá kuití vá náki'o ndu'u ndivé'e noo Ndios sa'a ndidaá ndo'ó, ta daá kuití vá ndíko'on ini ndu ndo'ó noó ká'an ndu xí'ín ná,

³ ta daá kuití ñó'o ini ndu noo ká'an ndu xí'ín Ndios, na kúu tatá yo, sa'a ña va'a kée ndó sa'a ña kándéé iní ndo ná, xí'ín sa'a choon kée ndó sa'a ña kú'u ini ndo sa'a dao ka na, xí'ín sa'a ña ndíta ndaa ndo xí'ín tandéé iní kómí ndó sa'a Jesucristo, na kúu sato'o yo.

⁴ Ná'á ndu'u, ñani, ndo'ó na kú'u ini Ndios sa'a, ña mií ná ni kaxi ñaá kakuu ndó ñayuu na.

⁵ Sa'a ñoo tá ni daná'a ndu to'on va'a sa'a Jesús noo ndo, o duú xí'ín to'on oon ni ni daná'a ndu, dá chī ni kechóon ndu ndéé Ndios, ta mií Espiritu ii Ndios kúu na ni xi'o ña ni kandaa tá'í ini ndo ña

kían to'on ndaa. Ta ná'á va'a mií ndó ña va'a va ni sa kee ndu'u tá ni sa ndei ndu xí'ín ndó sa'á ña kú'u iní ndu sa'a ndo.

⁶ Ta kúú ni kasandaá ndo kée ndó tátoto'on kée mií ndú, ta ni kasandaá ta'ani ndó kée ndó tátoto'on sa kee sato'o yo Jesús. Ta va'ará ni ndo'o nani níto ndo, tído ni natiin ndó to'on va'a sa'a ná xí'an kádii iní ndo ni kee Espíritu ii Ndios.

⁷ Ta kii'lo dión ni ndo'o ndó, dá ni kasandaá ndo kúú ndó ñayuu ná'a mií noo ndidaá na kándisa Jesús ndéi chí kuendá Macedonia xí'ín kuendá Acaya.

⁸ Chi xí'ín ndo'ó ni naka'ani to'on va'a sa'a sato'o yo Jesús. Ta o duú iin tó'ón ní Macedonia xí'ín Acaya ní naka'ani to'on ñoo ni kee ndo'ó, dá chi sa ndidaá kúú vá xían ná'a ñayuu ña kándéé iní ndo Ndios. Sa'á ñoo ko xínño'ó ka ña kastoto'on ndu xí'ín ná.

⁹ Chi di'a nákani va mií ná xí'ín ndu'u tátoto'on kii'lo ni natiin ndó ndu'u, ta nákani ta'ani na tátoto'on ni kee ndó ni dankoo ndó ndidaá kúú yoko ni sa ndaño'o ndó, dá ni kasá'á ndaño'o ndó na kúú Ndios takí, na mi'an ndaa kuití kúú Ndios, ta kéchóon ndó noo ná viti.

¹⁰ Ta nákani ta'ani na xí'ín ndu'u ña ndáti ndó nandió ko tuku Jesús, na kúú de'e Ndios, kii na chí induú, ta Jesús yó'o kúú na ni nataki tein na ni xii, ta na yó'o kúú na dáka'ki ñaá noo ña xido iní Ndios vei sata ñayuu kée kuachi.

2

Kii'lo di'a ni kéchóon Pablo ñoo Tesalónica

¹ Ta sa ná'á ndó, ñani, ña ko ní naá óon ta'on choon ni sa' ndu ni kee ndu noo ndéi ndó.

2 Dá chi ná'á ndó ña ni ka'an ndava'a ñayuu ndéi ñoo Filipos xí'in ndu'u, ta ni kendava'a na xí'in ndú. Tído mií Ndios kúú na ni xí'o tandeé iní noo ndú'u, sa'á ñoo kó ní yu'ú ta'on ndu saá ndu kasto'on ndu xí'in ndó sa'á to'on va'a ña ká'an sa'a Jesús, va'ará ni ndo'o nda'o níoo ndú ni kee dao na ñoo ndo.

3 Ta kó ní dána'a ndu ña to'on noo ndo, ta kó ní dána'a ndu noo ndo xí'in ñaxintóni kíni, ta kó ní ndúkú ndú ña dánda'í ndu ndo'ó.

4 Mií vá Ndios kúú na ni nata'an ini ni xini na ndu'u, ta ni xí'o na choon noo ndú ña dána'a ndu noo ndo sa'á to'on va'a ña ká'an sa'a Jesús. Ta kó ndúkú ta'on ndu'u ña kían nata'an ini ñayuu sa'á ña kée ndu. Di'a ndúkú ndu'u ña nata'an ini Ndios, na ná'á táto'on nákani ini níoo iin rá iin yó.

5 Ta ná'á ndó ña ni iin kuu ta'on kó ní kéchóon ndu'u to'on luu ká'an, dá dána'a ndu noo ndo. Ta kó ní ndúkú ta'on ndu ña kí'o ndó ñi'ón noo ndú. Ta mií Ndios kúú na xí'o kuendá ña kí'o dión kíán.

6 Ta ni kó ndúkú ndu'u ña kían chindaya'i ñaá ñayuu, ni ña chindaya'i ñaá ndo'ó, ta ni dao ka na, va'ará kánian koo ñañó'ó ndó noo ndú'u sa'á ña kúú ndú apóstol, na né'e to'on Cristo Jesús.

7 Ni sa io leé ini ndu xí'in ndó, chi sa kee ndu xí'in ndó táto'on kée iin ñá'a ndaá va'a de'án.

8 Ta ndó'o nda'o ndu'u sa'a ndo. Ta o duú to'on va'a Ndios oon ni ní chíkáa ini ndu kí'o ndu noo ndo daá ñoo, chi ni sa io nduu ta'ani ndu nakí'o ndu mií ndú kuu ndu sa'a ndo, chi ni kuká'ano nda'o ña kú'u ini ndu sa'a ndo.

9 Sa ná'á vá mií ndó, ñani, táto'on kí'o ni ndo'o ndu ni sa kechóon ndu. Nduú ñoo sa kechóon ndu'u, dá ná dá'a ni dáta'an ndu ni iin ndo'ó xían

nani n̄i daná'a ndu to'on va'a Ndios noo ndo.

10 Mií ndó xí'o ndaa kuendá xí'ín Ndios ña vii n̄i sa ndei ndu, ta n̄i kenda ndu xí'ín ndó, ta ni iin ña'a ko ní ya'a ndu kee ndu tá n̄i sa ndei ndu xí'ín ndo'ó, na kúú kuendá Jesús.

11 Ta ná'a ta'ani mií ndó ña tát'o'on kée iin tata xí'ín de'e na, ki'o dión sa ká'an ni'ini ndu noo iin rá iin ndó, ta sa xi'o ndu'u tandeé iní noo ndo,

12 ta sa sa'anda ndu choon noo ndo ña kee ndó tát'o'on ki'o kánian kee na kúú ñayuu Ndios, chi n̄i nakana ñaá ná ña kandeí ndó noo ndato náye'e ndaa noo ió na dándáki na.

13 Sa'á ñoo ko sá tuu ta'on ndu náki'o ndu'u ndivé'e noo Ndios, chi tá n̄i daná'a ndu to'on Ndios noo ndo, kúú ndato n̄i ñatiin ndóan tá n̄i seídó'o ndóan. Ta ko ní nátiin ndóan kíán to'on n̄i kana tein ñaxintóni ta. Di'a n̄i ñatiin ndóan ña miían ndaa ndisa kíán to'on Ndios, tá'an ña chíndeé ndo'ó ndíta ndaa ndo xí'ín ña kándisa ndó.

14 Ta ndo'ó, ñani, n̄i ndo'o ta'ani ndó tandó'ó tát'o'on ki'o n̄i ndo'o na kúú ñayuu Ndios kúú kuendá Cristo Jesús ndéi chí kuendá Judea di'a. Chi n̄i kendava'a ta'ani na ñoo mií ndó xí'ín ndó tát'o'on ki'o sa kendava'a ta ñoo Israel xí'ín mií ná.

15 Ta n̄i sa'ání ta ñoo Israel yó'o sato'o yo Jesús tát'o'on ki'o n̄i sa'ání rá profeta mií rá n̄i sa ndei sa na'á. Ta n̄i taó xoo ra ndu'u tein mií rá, ta ko náta'an ini Ndios xiní ñaá ná, ta xiní u'u ra ndidaá ñayuu,

16 chi sadí ra noo ndú, dá ná dá'a ni dána'a ndu noo na ko kúú na Israel, dá ná o ní'i ná ña káki na noo kuachi na. Dión kée ra, sa'á ñoo n̄i ndukua'a cháá ka kuachi ra noo Ndios, ta n̄i kasáa ña xido nda'o ini na sata rá sa'á ña kini kée ra.

Kóni Pablo ko'on tuku na koto ni'ini ñaá ná

17 Ñani, tá n̄i ya'a cháá kuu n̄i kexoo ndu'u tein ndó, kúú sa n̄i kasá'á vá nda'í ká'an ndu'u nandió kuéi ndu kande'é ndú ndo'ó, dá chí va'ará ndéi xoo ndu, tído daá kuití vá ñó'o ini ndu sa'a ndo.

18 Sa'á ñoó n̄i ka'án ndú saa ndu kande'é ndú ndo'ó. Ta yu'u Pablo, kua'á nda'o ta'ándá n̄i ka'ín saai noo ndéi ndó, tído n̄i ketéin ña u'u noo ndú.

19 Dá chí ¿á kō ná'á ndó ndá yoo kakuu tandeé iní noo ndú, ta ndá yoo ki'o ña kadii ini ndu, ta ndá yoo kakuu corona ndu, na ka'an va'a ndu sa'a? ¿Á kō ná'á ta'on ndó ña ñaá kakuu ndo'ó tá ná kasandaá kuu nandió koo tuku Jesucristo, na kúú sato'o yo, kasaa na?

20 Chí sa'a ndo'ó natiin ndu ñaño'ó xí'an kadii iní ndu.

3

Ni sa'an Timoteo ñoo Tesalónica ni xito ni'ini ñaá xí

1 Ta sa'á ña kō xí'o ndeé ka iní ndu ña nákani ini ndu sa'a ndo, sa'á ñoó n̄i kandoo ndu ña kían kandoo ndu ñoo Atenas,

2 dá n̄i tanda'á ndú ñani ndu Timoteo kosaa xi noo ndéi ndó, chí kéchóon xi noo Ndios, ta kéchóon dáó ta'ani xi xí'ín ndú noo xionoo ndu dána'a ndu to'on va'a sa'a Jesús. Dá ná chindeé xí ndo'ó kandita toon cháá ka ndo xí'ín ña ndaa kándisa yó, ta ná ki'o ta'ani xi tandeé iní noo ndo,

3 dá kían ná dá'a ni kexoo ni iin ndó noo ña kándisa ndó kée tandó'ó ndó'o ndó, chí sa ná'á vá mií ndó ña kánian kando'o yó tandó'ó.

4 Chí tá n̄i sa ndei ndu xí'ín ndo'ó, dá n̄i kast'o'on ndu ña kendava'a ñayuu xí'ín yó sa'á ña kúú yó

kuendá Jesús, ta ná'á va'a mií ndó ña k̄i'o dión ndó'o yó viti.

⁵ Ta sa'á ña ko ní xi'o ndeé ka inii ña nákani inii sa'a ndo, sa'á ñoó ni tanda'í Timoteo kosaa xi noó ndéi ndó, dá kandaá inii nde'á á ndíta ndaa ii ndo xí'ín ña kándéé iní ndo Jesús. Dá ch̄i ni yu'íi ña oon ni ví ni kexíxi ña u'u xí'ín ndó, ta ni kandeéán ni danda'ávián ndo'ó, ta ni naá óon choon ni kee ndu ni daná'a ndu noo ndo.

⁶ Tído sa ni nandió koo va Timoteo ni ndusáa xi noo ndéi ndu. Ta va'a ká'an xi sa'a ndo, ña ndíta ndaa ii va ndó xí'ín ña kándéé iní ndo Jesús. Ta kú'u ini sa'a sátá'an ii va ndó. Ta kaá ta'ani xi ña daá vá ñó'o va ini ndo sa'a ndú sa'á ña kóni ndo ndú, ta kóni k̄i ndo koni tuku ndó ndu'u, tát'on k̄i'o kóni ta'ani ndu'u koni ndu ndo'ó.

⁷ Ñani, ndó'o ndu tandó'ó noó ndéi ndu yó'o, ta nda'í kúu ini ndu, tído ni ndundeé iní ndu tá ni kandaá ini ndu ña ndíta ndaa ndo'ó xí'ín ña kándéé iní ndo Jesús.

⁸ Ta kúu ni naní'i ini ndu, xiní ndu, tá ni kandaá ini ndu ña ndíta toon ndó xí'ín sato'o yo Jesús.

⁹ ¿Ndí kuú ví ndivé'e naki'o ndu'u noo Ndios sa'a ndo? Ch̄i kadij nda'o ini ndu'u noo Ndios kée ndó,

¹⁰ ta nduú ñoó xika ndu'u noo ná ña ná konó ná saa ndu kande'é ndú ndo'ó, dá dáxinkoo ndu ña kómani kandaá ini ndo, dá kua'ano cháá ka ndo xí'ín ña kándéé iní ndo Jesús.

¹¹ Ta kóni ndu'u ña mií tatá yo Ndios xí'ín sato'o yo Jesucristo ná konó ná ích̄i saa ndu noo ndéi ndó.

¹² Ta na kúu sato'o yo ná chindeé ná ndo'ó, dá ná kua'ano cháá ka ña kú'u sátá'an ini ndo sa'a ndo xí'ín sa'a ndidaá ka ñayuu tát'on k̄i'o kée ndu'u kú'u ini ndu sa'a ndo,

13 ta ná k̄i'o na ña kandita toon ndó, dá ná koo vii ndo noo Ndios, na kúú tatá yo, tá ná kasandaá kuu nandió koo mií Jesucristo, na kúú sato'o yo, xí'ín ndidaá ñayuu na. Díon ná koo.

4

K̄i'o di'a kánian kee yó, dá nata'an ini Ndios koni na yó

1 Ta viti, ñani, seí nda'í ndu noo ndo, ta ká'an ni'ini ndu noo ndo sa'á ña kúú yó kuendá sato'o yo Jesús. Ch̄i sa n̄i daná'a ndu noo ndo ndí k̄ián kánian kee ndó, dá nata'an ini Ndios koni ñaá ná. Ta k̄i'o díon kée ndó viti, tído koo ini ndo kat̄i'a cháá ka ndo kee ndóan.

2 Ch̄i sa ná'á vá ndó ndá choon n̄i sa'anda ndu noo ndo kee ndó, ch̄i noo sato'o yo Jesús n̄i n̄i'í ndu'u choon yó'o.

3 Ch̄i ña kóni Ndios k̄ián koo vii ndo noo ná. Sa'á ñoó o sa koo ini ndo dáyako ndo mií ndó xí'ín kuachi xí'ín na kó kúú ñadi'í ndo o yíi ndo.

4 Di'a koo ini iin rá iin ndó kat̄i'a ndó koo vii ndo xí'ín na kúú ñadi'í mií ndó, ta koo ñañó'ó ndó noo ná.

5 Ta o sa kátoó ndo kee ndó ña ka'an noo tát'on k̄i'o kée ñayuu kó ná'á Ndios.

6 Ta ni iin tó'ón ndó o sa koo ini koni xíxi ñani ndo kuendá Jesús xí'ín ña kini yó'o, ch̄i ka'í nda'o dándó'o Ndios níno ndo sa'á kuachi yó'o tát'on sa n̄i kasto'on ndu xí'ín ndó, ta n̄i x̄i'o ndu kuendá noo ndo.

7 Ch̄i kó ní kána ta'on Ndios yó ña k̄ián kandeí yó kee yó ña kini kóni ñíi yo. Di'a n̄i kana na yó ña koo vii yo noo ná.

⁸ Sa'á ñoó ndi ndáa mií vá ndó kénóo to'on dána'a ndu yó'o, kana'á ndó ña kọ kénóo ta'on ndó ni iin ɽa ñayuu yó'o. Di'a mií vá Ndios, na ni xi'o Espiritu ií ná noo yo, noón kúú na kénóo ndó.

⁹ Kọ káni kaan ña taa ndu'u ña ku'u sátá'an ini ndo sa'a ndo, dá chi sa ni daná'a va mií Ndios noo ndo ña ku'u ini sa'a sátá'an ndó.

¹⁰ Ta dión ta'ani kée ndó xí'in ndidaá ka na kúú kuendá Jesús, na ndéi chí kuendá Macedonia di'a. Tído seí nda'í ndu noo ndo, ñani, ña ká'ano cháa ka ná kakuu ña kú'u ini ndo sa'a ná.

¹¹ Ta koo ini ndo koo va'a ini ndo xí'in ndidaá ñayuu. Ta ndi'i ini ndo noo choon kée mií ndó, o sa chírneé ndó mií ndó noo dao ka ña'a. Ta ndi'i ini ndo kechóon ndó, dá ni'i ndo ña'a kasá'an ndó, táto'on ni sa'anda ndu choon noo ndo.

¹² Dá kían ná koo ñañó'ó ñayuu kọ ná'á Ndios noo ndo, ta ni iin ña'a ná o kámani noo ndo.

Di'a koo, dá nandió kọo tuku Jesús kii na ñayuu yó'o

¹³ Ta viti kóni ndu'u ña kana'á ndó, ñani, sa'a ndí kían ndo'o ñayuu ni xi'i, dá ná o kúnda'í ini ndo sa'a ná táto'on ki'o ndó'o na kọo ɽandee iní noo.

¹⁴ Chi kándisa yó ña ni xi'i Jesús, ta ni natakí na. Ta ki'o dión ta'ani dákí'in tá'an Ndios na kúú kuendá Jesús ni xi'i xí'in mií Jesús.

¹⁵ Ta viti ko'on ndu kasto'on ndu xí'in ndó to'on ni ka'an mií sato'o yo Jesús, chi ni kaa na ña yóo, na ndéi takí ií tá ná nandió kọo mií Jesús kii na ñayuu yó'o, o kuió noo ta'on yó ko'on yo noo na sa ni xi'i ko'o naki'in tá'an yó xí'in Jesús.

¹⁶ Chi dinñó'ó ta'anda choon chí induú, dá táí kayu'ú iin arcángel, ta táí ka'an trompeta Ndios,

dá ví noo sato'o yō Jesús nda induú kii na. Ta kúú dinñó'ó ka nataki na sa ni xi'i kúú kuendá Jesús.

¹⁷ Tá ni ndi'i, ndidaá yóó, na ndéi takí ii noñó'o yó'o, nadítá Ndios ko'on dáó yó xí'ín na ni nataki ñóó noo vikō káa naki'in tá'an yó xí'ín sato'o yō Jesús noó tachī. Ta dión kandeí kuií yō xí'ín ná.

¹⁸ Sa'á ñóó kī'o ndó tandeé iní noo iin rá iin ndó xí'ín to'on yó'o.

5

Ná kandeí nduu yō, chí kō ná'á yó ndá oon nandió kōo Jesús

¹ Ta sa'a ndá oon koo dión xí'ín ndi kooan, kō káni kaan taai ña saa noo ndo, ñani,

² dá chí sa ná'á va'a mií ndó ña iin ndakána va kasandaá kuū nandió kōo sato'o yō, táto'on kī'o kée iin ta kui'íná tá vei ra sakuaá ki'in kuí'íná ñaá rá.

³ Mií kuū ka'an ñayuu di'a: “Va'a nda'o ndéi yó, kōó ka va tandó'ó noo yō viti”, kaa na, ta kúú iin ndakána va tiin ñaá tandó'ó kini ñóó, táto'on iin ndakána kásá'á káki de'e na ñá'a. Ta ni iin tó'ón ná o káki noó tandó'ó yó'o.

⁴ Tído ndo'ó, ñani, sa ná'á ndó táto'on kī'o koo, chí kō iin naá ka noo ndo sa'á ña yó'o. Sa'á ñóó o tīn ndakána kuū yó'o ndo'ó táto'on kī'o tīn ndakána iin ta kui'íná ñayuu ki'in kuí'íná rá.

⁵ Chí sa ndidaá kúú vá ndo'ó kúú na toon noo, chí sa ni natoon noo ndo. Ta kō iin naá ka noo yō, chí kō kúú ka yō kuendá noo iin naá.

⁶ Sa'á ñóó ná o sa kúdi yō táto'on kī'o kée ñayuu kō ná'á Ndios. Di'a ná kandeí nduu yō, ta ná kaño'o ini yō.

⁷ Dá chí nà kídì, sàkuaá kídì nà, ta nà xí'i, sàkuaá xí'i na.

⁸ Tído yóó kúú nà sà tóon noo, sa'á ñoó ná kaño'o ini yo. Ná koo ini yo ña kandeé iní yo Jesús, ta ná ku'u ini yo sa'a dao ka ñayuu. Ta ña yó'o ná kakuu tát'on iin kaa kanda'a yika yo. Ta tandeé iní kómí yó ña miian ndaa kuití káki yó noo kuachi yo ná kakuu tát'on iin kaa kanóo diní yo.

⁹ Chí kò ní kaxi Ndios yó, dá kuido ini nà koni nà yó. Di'a nì kaxi na yó, dá ni'i yo ña káki yó noo kuachi yo sa'á ña nì kee Jesucristo, nà kúú sato'o yo,

¹⁰ nà nì xi'i sa'a yo, dá kían, va'ará nì xi'i yo o takí yo, tído kandeí dáó yó xí'ín ná.

¹¹ Sa'á ñoó kì'o tá'an ndó tandeé iní yó'o noo iin rá iin ndó, ta dákuá'ano tá'an ndó xí'ín to'on Ndios tát'on kì'o kée ndó ndéi ndó.

Ká'an ni'ini Pablo noo nà kúú kuendá Jesús

¹² Ta seí nda'í ndu noo ndo, ñani, ña koo ini ndo koo ñaño'ó ndó noo nà kéchóon noo ndo, chí nì xi'o sato'o yo Jesús choon noo ná ña kuita na noo ndo, ta ka'an ni'ini na noo ndo.

¹³ Sa'á ñoó koo ñaño'ó ndó noo ná, ta ku'u nda'o ini ndo sa'a ná sa'a choon kée na noo ndo. Ta ná koo ini ndo kandeí va'a ndó xí'ín iin rá iin ndó.

¹⁴ Ta seí nda'í ta'ani ndu noo ndo ña koo ini ndo dánani ndó nà dúsá, nà kò kóni kechóon. Ta kì'o ndó tandeé iní noo nà nì ndìko, ta chindeé ndó nà vitá ini. Ta kueé koo ini ndo xí'ín ndidaá kúú ñayuu.

¹⁵ Ta o sa kóo ini ndo nandió né'e ndó ña kini kée dao ka ñayuu xí'ín ndó. Di'a ndi'i ini ndo kee ndó

ñá va'a xí'ín iin rá iin ndó. Ta dión ta'ani kee ndó xí'ín ndidaá ka ni ñayuu.

16 Ta daá kuití ná koo dii iní ndo.

17 Ta o sa kátuu ndó ña ká'an ndo xí'ín Ndios.

18 Ta naki'o ndó ndivé'e noo ná sa'a ndidaá ña ndó'o ndó, chi k'i'o dión kóni mií Ndios kee yó sa'á ña kúu yó kuendá Cristo Jesús.

19 O sa kadí ndo noo ña kóni Espiritu ij Ndios kee na.

20 O sa kú'ichi ini ndo kueídó'o ndó to'on ni xi'o mií Ndios noo ñayuu dána'a noo ndo.

21 Korndodó va'a ndó ndidaá kúu ña dána'a na, dá naki'in va'a ndó ña kían va'a.

22 Ta taó xoo ndó mií ndó noo ndidaá ña kini.

23 Ta mií Ndios, na xí'o ña koo va'a ini yo, ná kevii ní ná ndo'ó, ta ná taxí vii ná iin ní kúu ndó, espíritu ndo, xí'ín ní'o ndo, xí'ín yikí koño ndo, dá kían ná koo vii ndo tá ná kasandaá kuu nandió koo tuku Jesucristo, na kúu sato'o yo, kasa na.

24 Dá chi iin na ndaa kúu Ndios, na ni kana ndo'ó xoo mií ná, ta noón kúu na kee ña yó'o xí'ín ndó.

Xí'ín ndisá'án yó'o dándí'i Pablo ña ká'an na

25 Ñani, kaka ndo ña maní noo Ndios sa'a ndú'u.

26 Ta chitó tá'an ndó noo ndo, ta ña yó'o ná kakuu iin ñaño'ó ka'an tá'an ndó ndisá'án xí'ín na kúu ñani ndo.

27 Ta sa'ándái choon noo ndo xí'ín choon ni xi'o Ndios nooí ña ka'i ndó tutí yó'o noo ndidaá ka na kúu ñayuu Ndios.

28 Ná koo ña maní xí'o sato'o yo Jesucristo xí'ín iin rá iin ndó. Dión ná koo.

**Tuti yó'o kúú to'on Ndios, ta xí'o ña kuendá
sa'a Jesús
New Testament in Mixtec, Tezoatlán (MX:mx:Mixtec,
Tezoatlán)**

copyright © 2006 Wycliffe Bible Translators, Inc.

Language: Mixtec, Tezoatlán

Translation by: Wycliffe Bible Translators, Inc.

Mixteco, Tezoatlán [mx], Mexico

Copyright Information

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Tezoatlán

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

b81ac6b3-0ad5-5336-8d42-4c2703b04e9f